

Legria tar politicras, schurnalistas e sin la piazza federala

Reacziuns suenter l'elecziun da duas novas cusseglieras federalas

DA CLAUDIA CADRUVI / ANR

■ Spetgà han ins gea che duas dunnas vegnian elegidas en il cussegl federal. Tuttina èsi insatge special cura ch'igl è propi uschè lunsch – cunzunt era perquai che Viola Amherd e Karin

Keller-Sutter èn vegnidas elegidas cun resultats uschè excellents gist en l'emprim scrutini. Sis dunnas han raquità ier suenter las tschernas a l'anrte ch'i munta per ellas ch'i dat uss finalmain in tschert equiliber tranter las schlattainas en la regenza svizra.

Vallais n'avess betg quintà cun Amherd

Era sch'ins discorra en il Vallais gia dapi dus onns da Viola Amherd sco successura per Doris Leuthard n'han blers betg carti ch'ella vegnia elegida. Il Vallais ha fin uss gi trais cussegliers federals – tuts umens. Gnanc ina secunda avess ins pudì s'imaginar ch'ina dunna dal Vallais sura fetschia la cursa. Igl è in'enorma surpraisa. Tant pli che Amherd è fitg liberala e na represchenta betg la pcd conservativa vallesana. Mais voilà, sche las dunnas tegnan ensemen poi ir fitg svelto, sco las duas elecziuns en l'emprim scrutini mussan.

Igl è extrem tge che Amherd ha prestà. Ella ha fatg strada tut persula, ella na tutga betg tar il tipic apparat da partida, ella n'è betg vegnida promovida dad umens ed ella ha cuntanschì questa elecziun ord atgna forza. Naven dad uss vegn ella ad avair il sustegn da ses chantun. I n'è betg uschia ch'ella n'aveva betg quel fin uss. Ella è simplamain stada pauc enconuschenta. Ella ha cunzunt fatg politica en la citad da Brig. En il rest dal chantun han ins strusch enconuschì ella. Igl è classa ch'ina dunna – che viva tut suletta – arriva en quest post.



La schurnalista Stéphanie Germanier scriva per «Le Nouvellist» en il Vallais. FOTOS C. CARUVI

Simplamain happy

«Avant otg onns sun jau era vegnida sin la piazza federala per gratular a Karin Keller-Sutter ed jau sun stada fitg trumpada ch'ella n'è betg vegnida elegida. Uss sun jau happy, simplamain happy. Ella è fitg cumpetenta. Son Gagl dovra puspè in fil a Berna. Ins ha tralascià ils ultims onns noss chantun, per exempel puncto vias u colliaziuns da viafier.

Jau na sun betg en ina partida, ma mes figl e mes schender èn presidents en la pld. Jau stos adina tegnair encunter in zichel, pertge jau sun in uffant da lavurers. Igl è bun per l'equiliber che duas novas dunnas èn vegnidas elegidas en il

cussegl federal. I dastgass esser anc ina dapli. Ins na dastga sa chapescha betg eleger dunnas mo perquai ch'ellas èn dunnas, ellas ston schon avair format. In cussegl federal mo cun umens na dastgi mai pli dar.

Ozendi han las dunnas uschè bunas scolaziuns che quai è passà. Jau mezza deriv d'ina paupra famiglia e n'hai betg dastgà far in emprendissadi. Jau hai l'emprim lavurà en la branscha da textiliars, hai suenter fatg scolaziuns da biro e da massadra ed hai blers onns fatg servetsch d'ambulanza e sun stada instructra en il servetsch civil.»



Edith Bischofberger da Thal sper il Lai da Constanza è aposta vegnida ier a Berna per purtar in matg cun arbajas e cun rosas alvas a Karin Keller-Sutter.

Dunna per il departament militar?

«Ord vista da las dunnas èsi in bun di. Uss constat la repartiziun en il cussegl federal puspè. La mesadad da la populaziun svizra èn dunnas. Ina repartiziun gista stuess esser normala en l'avegnir. Igl è legher: Jau hai scumess che Viola Amherd vegnia elegida en l'emprim scrutini ed igl è propi stà uschia. Quai è in fitg bun ed impurtant segn. Areguard la repartiziun da departaments: Al departament da defensiu e sport fashessi bain dad avair ina giada ina dunna sco schef. Las duas novas cusseglieras èn dunnas che lavuran bain en in team. Quai dat ina buna cultura da discussiun che pussibilitescha da chattar soluziuns. En questa cumposiziun dal cussegl federal n'avess ins betg prendì la decisiun per exports dad armas. Ins avess pensà pli fitg vi da las consequenzas da tals exports.»



Rosmarie Quadranti maina la fracziun da la pbd en il cussegl nazional.

KEYSTONE

Agitaziun e fevra

«Jau m'allegro fitg da las duas novas cusseglieras federalas – sa chapescha in zichel dapli da l'elecziun da Viola Amherd. Ella è commembra d'onur da nossa musica. Nus avain adina in zichel temì che Heidi Zgraggen fetschia forsà anc la cursa ed igl è lura stà ina surpraisa ch'i ha tanschì gia en l'emprim scrutini. Nus essan stads en l'hotel durant l'elecziun ed avain guardà televisiun. Nus essan tuts stads agitads ed avain gi in pau fevra. Per mai èsi fitg positiv che dapli dunnas vegnan en il cussegl federal ed era che nus avain ina represchenta or d'in vitg da muntogna.»



Rahel Studer suna oboa ed è gimnasta al Kollegium Spiritus Sanctus a Brig. Ella ha sunà ier cun la chapella da Brig sin la piazza federala.

Martullo fiss er ina dunna

«Igl è stà nairas uras. Sche las duas dunnas na fissan betg vegnidas elegidas fiss mo pli Simonetta Sommaruga stada en il cussegl federal. Quai na va betg, mo ina dunna sin set sez. I dat gea dapli dunnas ch'umens en nossa societad. Dacurt ha SRF emess ina docu: Da 117 cussegliers federals èn mo set stadas dunnas. Il temp è pia pli che madir per dunnas en il cussegl federal.

Sch'ins pensa dentant che Ueli Maurer sa retira e Magdalena Martullo candidescha forsà hai jau schon tscherts cumbats interns. Ma ins sto dir: Igl è stà gist che la pcd ha preschenta in ticket stget feminin. Sch'ins è consequent ston ins pia era morder en in mail asch ed acceptar che Martullo fiss er ina dunna. La finamira è numnadamain che las dunnas pon far politica normala e na ston betg sa fatschentar cun tematicas da dunnas.

En il film sin SRF ha Doris Leuthard ditg che la sortida da l'energia atomara saja stada pussaivla be cun las dunnas en



Anna Kappeler rapporta per la gasetta «Schaffhauser Nachrichten» ord la chasa federala.

il cussegl federal. Ina tala maiorità è er impurtanta per realisar la cumpatibilità da famiglia e professiun. Igl è gea incredibile quant ditg ch'ins ha duvrà per ac-

ceptar ina quota da dunnas light e da far in pitschen pass per l'egualità da paja. Puncto tematicas da dunnas è la Svizra in pajais da svilup.»

Las novas san co i marscha

«Gia la damaun da vegnir en chasa federala sun jau m'allegrada ed ida cun in pulit tempo cun velo. Jau sun stada segira che duas dunnas vegnian elegidas. Quai è da gronda muntada. Igl è gea ina paupra chaussa che la pld n'ha 30 onns betg pli gi ina dunna en il cussegl federal. Jau sun segira ch'ins po uss finalmain plazzar meglier dumondas da dunnas en quest gremi.

L'onn proxim datti puspè elecziuns nazionalas ed jau sper ch'i dettia suenter dapli che 30 pertschient dunnas en il parlament. En la chombra pitschna vesi dentant ora mal puncto dunnas: La Partida verda porta perquai bleras candidatas ed jau sper che ina u l'autra vegnia elegida.



Cun Viola Amherd e Karin Keller-Sutter pudain nus cuntanscher insatge, ellas san co ch'il manaschi a Berna funcziuna. Quitads fatsch jau sa chapescha per la debatta da CO₂ ed jau sper che Amherd haja en questa fatschenta la medema tenuta sco Doris Leuthard. Tar Keller-Sutter da la pld èsi cler ch'ella è d'in auter avis. Ma jau hai tuttina il sentiment ch'ins cuntanschia en tematicas da l'economia e da l'ecologia cun questas dunnas in zichel dapli che fin uss.»

La cussegliera nazionala verda dal chantun Berna Aline Trede.